


De Eren a Ijende Er Ka Ishiôr Ga

Aluer kwase ya ijende a nomsoor, shin nomsoor ya ijende a kwase kpa ka kwaghbo ga. Kpa aluer ka a kuma pe u hii ishiôr ga tsô u gba hiin u lamen a ijende you la kpoo inja er nan ngu ishiôr you kpaa yô, kwagh la una va a mbamzeyol. U er nan ve u yange kwagh ne?

Kwagh u vesen u u er yô, de eren kwagh a ijende you inja er ka ishiôr nahan ga. Kwagh u una wase u u eren kwagh ne yô, hen sha akaa a a vande eren ior yô, nahan na mlumun sha mbampin mba ve dondo ne.



KWAGH U A ER KPÔÔ KPÔÔ YÔ

“Wankwase ugen
yange hen ér mo
m hii u sôôr un”

Gumor ugen iti na ér Jason, yange ya ijende vea wankwase ugen kangenaa. A kaa ér: “Sha hiihii la hanma wase nan ôr sha zwa u nan ér ka ishiôr ga.” Nahan kpa, Jason za hemen u tindin wankwase la a ilyoho sha hanseeti kpoghuloo, shi keren gbenda u man ahumbe vea na. Jason kaa ér: “Kwagh u m lu eren ne lu sha mi ga. Wankwase ne yange lu henen ér mo m hii u sôôr un, shi mo m soo u kenden un ga.”

Shin er yange ve vande ôron ér ve mba ijende tseegh nahan kpa, ka nyi yange i na ve wankwase la va hingir u henen ér Jason ngu sôôr unu?

Ka nyi akaa nahan Jason yange ma er ve wankwase la ma hen ér ngu sôôr un a sôôr ga?



“Ufoto av mba sha Intanet cii ka vea hiin u doon wanyekwase ishima je tsô maa m gba henen mer nan soo ér mo m sôôr nan.”
—Mkaanem ma Steven, gumor ugen.

KWAGH U A ER KPÔÔ KPÔÔ YÔ

“Wannomso ugen
yange kaa a mo
ér m er un a
ishima”

Annette, wankwase ugen kaa wener, yange un hii iliam vea wannomso ugen, kpa ve lam “za per uwegh. Sha hiihii la, m hen mer ngu ijende i dedoo. Ashighe kpishi se lu imôngo gbem, kpa m tôô mer ngu ishiôr yam ga. Shi m hen mer un kpa a tôô ér mo m ngu ishiôr na ga. Kpa shighe kar yô, a pinem ishiôr. M ôron un mer ka boki tseegh se lu yô, ishima vihi un. Yange kaa a mo ér m er un a ishima shi ka mo m fe kwagh u m lu eren ye.”

U nenge wer er wannomso la yange hen ér Annette soo ér una lu ishiôr na la, lu shami gaa? A lu shami yô, ka sha ci u nyi? Man a lu shami ga di yô, ka sha ci u nyi?



Ka nyi akaa nahan Annette yange ma er ve zayol ne ma za hemen ga?




“Saa u hian a or ve a tese ér ka ishiôr ga; ashighe agen ka wea ver a ver ashe tseegh tsô wer or a sôôr we kpa, nan fa.”—Mkaanem ma Karen, gumkwase ugen.

KWAGH U A ER KPÔÔ KPÔÔ YÔ

“Hanma shighe
yange se lu se
uhar”

Rachel yange lu nengen a kwagh ken wannomso ugen u tesen ér a soo u sôôr un. A kaa ér: “Hanma or yange nan nenge er mo vea na se luun se uhar hanma shighe yô. Kwagen la kamer mo uwegh ken ijime ghem. Nahan m tôô mer a soo u sôôr mo—kpa m va pinen un yô, a kaa a mo ér ka boki tseegh se lu ye, kwagh hembra nahala ga!”

Ityôkyaa ngi i Rachel yange ma hen ér wannomso la soo ér vea lu boki tseegh ga yôô? Yange una hen nahan yô, lu sha ci u nyi? Man una hen nahan ga yô, Ka sha ci u nyi?



Ka nyi akaa nahan wannomso la yange ma er ve wankwase la ma za hemen u nengen un ér ka boki tseegh, ka ishiôr ga?



“Or ka nana tesen ér u doo nan ishima yô, we kpa u nengen iyol you je wer u doo. Nahan alaghga u venda a nan ga sha er u za hemen u nengen iyol you nahan yô. Nahan kpa ka wea hembra wan kwagh u mbagenev ikyo a iyol you yô, kwagh la a yange u u eren or a ishima, nahan i tese ér u via ken jijingi.”—Mkaanem ma Brittany, gumkwase ugen.